



Province of the
EASTERN CAPE
EDUCATION



**NATIONAL
SENIOR CERTIFICATE**

IBANGA 11

NOVEMBA 2022

**ISIXHOSA ULWIMI LWASEKHAYA (HL)
IPHEPHA LOKUQALA (P1)
(EXEMPLAR)**

AMANQAKU: 70

IXESHA: liyure 2

Olu viwo lunamaphepha ali-12.

IPHEPHA LEMIYALELO NENGCACISO

1. Eli phepha lemibuzo LINAMACANDELO AMATHATHU:
ICANDELO A: Isicatshulwa (30)
ICANDELO B: Isishwankathelo (10)
ICANDELO C: Izakhi nemigaqo yokusetyenziswa kolwimi (30)
2. Funda YONKE imiyalelo ngocoselelo.
3. Phendula YONKE imibuzo.
4. Qala ICANDELO NGALINYE kwiphepha ELITSHA.
5. Krwela umgca ekupheleni KWECANDELO NGALINYE.
6. Nombola iimpendulo zakho kanye ngokwendlela ekunonjolwe ngayo kweli phepha lemibuzo.
7. Shiya umgca emva kwempendulo nganye ukuze umsebenzi wakho ungaxinani.
8. Qwalasela ngeliso elibukhali upelo nolwakhiwo lwezivakalisi.
9. Yaba ixesha lakho ngolu hlobo:
ICANDELO A: Imizuzu engama-50
ICANDELO B: Imizuzu engama-30
ICANDELO C: Imizuzu engama-40
10. Bhala ngokucacileyo nangokucocekileyo.

ICANDELO A: ISICATSHULWA SOKUQONDA**UMBUZO 1: UKUFUNDELA INTSINGISELO NOKUQONDA**

Funda ISICATSHULWA A, uze uphendule imibuzo esekwe kuso.

ISICATSHULWA A**UVELWANO**

- 1 Nawuphi na umntu obenokuthi ashumayele ngovelwano, ukuze ithi intshumayelo yakhe intshulise izithombo zovelwano ebantwini ngale mihla, angathatyathwa njengomntu ongoyena wenze into enkulukazi. Kaloku uvelwano oluqulathwe yiyo yonke intlalo yakudala esiXhoseni, lutheshwaka. Lubiwe ziimpembelelo zobomi bedolophu nobasemLungwini. Singangabantu abayintoni ukuphulukwa luvelwano oluyenye yeemfihlelo ezibaluleke gqitha endalweni? Andithi lunamandla okutyhefa ukungcola ezintliziyweni, lusunduzisa ugrwangxuliswano ebantwini ukanti lukwanyibilikisa neyona ntliziyo iqinileyo? 5
- 2 Uvelwano luzalwa luthando, iimbekelwe ekubekelwe phezu kwazo ubuKrestu. Le nyaniso iqinisekiswa libalana endakhe ndalifunda. Kuthiwa wathi uYohane oNgcwele sele emdala kakhulu wacelwa ukuba aye kuyala indimbane yabantwana. Kangangobudala bakhe wayengasakwazi ukuhamba. Wathwalwa ke ngamadoda amsa kule ndawo wayeza kuthetha kuyo. Kuthiwa yazama ukuphakama indoda enkulu, ngemizamo emikhulu. Abantwana bawancina amehlo bamthi ntshoo, iindlebe bazithi ntaa ukwenzela ukuba bawabambe onke amazwi ayeza kuwa kuloo milebe yayingcangcazela, bavisisise nalo ntetho yayiza kwenziwa ngelizwi elidekedeke lobudala obugqithileyo. Yathi inkonde, "Bantwana, thandanani." Bonke abantu bothuka bakumbona esithi cwaka akugqiba. Bambi bathi nqa ukuba bangasindwa ngumntu bemzisa ukuba axhobise abantwana, aze yena athethe eli lizwana. Abanye babantwana badanduluka bathi, "Akukho nto yimbi uza kusixelela yona?" Yena uphendule ngokuthi, "Ndiniyalela oku qho, kuba ukuba niyasigqala esi siyalelo, akukho nto yimbi ningangayenza." Le nyaniso imi imi elizweni liphela. Xa sivelana nomntu, sizibeka emekweni yengqondo yakhe. Kwakho siyazilibala ezethu iziqu, sithabathe imo yalowo simvelayo. 15
- 3 Ukuvelana nomntu akufanele kuphelela ekumveleni kuthi ngaphakathi okanye ezingqondweni zethu qha. Lowo simvelayo masimncede simphungulele loo mthwalo umsindayo. Akukho buhlobo apho kungekho luvelwano lulolu hlobo. Ungadakumbi, udane kangankuba uzimisele ukungancedi nawuphi na omvelayo xa uthe akwafumana no-enkosi lo, emva kokumnceda umntu. Abanovelwano mababanyamezele abanje. Noyena uphantsi unebango kuncedwano olufanele ukubakho phakathi kwabantu. 20

- 4 Kuzo zonke izinto ezinokwenza umntu abe nothando komnye, ayikho 35
egqitha uvelwano. Kukangaphi ebomini bethu sibona umntu eguqulwa imo
yakhe lilizwi elithambileyo nenkangeleko esuka **kulusu** oluvuza ububele,
imo ebingenakuguqulwa zizigalo, izithuko nezinyeliso? Uvelwano emntwini
luthi lukhule lude lube luvelwano emzini ngokubanzi. Olu ke luzonda 40
ukuphakamisa abo bongqulwe yindlala nokutsala nzima kunye
nokusasaza impucuko ebantwini nokuzama ukungciba iintanda
ezisezindongeni zemitshato yamakhaya ngamakhaya.
- 5 Olu ncedo luxanduva olubekwe emagxeni omntu ngamnye ngenxa yale 45
nyaniso. Sidalwe asalingana ngeziphiso. Omnye akanakho nokuba
sethanda ukuba angafunda aye kufikelela emagqabini kwezobugqi
nezinye. Wumbi uyoyiswa kukulondoloza iisenti ade abe sisityebi nokuba
senelo bhongo. Ongenakufunda aye kufikelela kwiincwadi eziphambili uthi
kanti unesiphiso somsebenzi wezandla njalo njalo. Xa kunje ke lowo ube
nethamsanqa lokutyeba ngemali nemfuyo, lokuba nengqondo ebukhali
kunabanye, makathabathe intwana aphe abalambayo, aphe 50
abangenazinkabi indima, achazele abantu ngeemfihlelo zobugqi
abangenakuzazi bona ngokwabo.
- 6 Into ecace nasesidengeni yeyokuba ukungabikho kovelwano kuduba-duba 55
intlalo. Izityebi zizithi geqe kwizilambi, nezilambi kwizityebi. Lo nto ibangela
ukuba iinzima neengxaki zabatsala nzima zingaziwa kanye kanye okanye
zingakwazi ukulikhathaza ngokwaneleyo iliso kuzokuvakala laa ntlungu
itsho kuthi xhokro entliziyweni. Yile ke enokubangela umntu abone
imfuneko yeyakhe indima ekunciphiseni intlungu yabatsala nzima. Udidi
lwezityebi luzigcinela kulo uvelwano nobunkokheli, lube olwezilambi
luzigcinele inkonzo nembeko. Yile ntswela-luvelwano ebanga okokuba 60
bathi abasebenzi xa befuna imivuzo inyuswe, basuke bathi, "Asiyi
kuphangela ide inyuswe imivuzo." Iba buhlungu intliziyo yakho inge yopha
igazi, xa ubona umsebenzi ongaphangelanga ngoMvulo kuba egulelwe
ngumfazi, egxothwa emsebenzini. Umqeshi umgxotha esithi, "A suka!
Musa ukucinga ukuba obo buqinga bokuthi ubugulelwa ngumfazi ndiza 65
kubukholelwa. Thabatha ibhatyi yakho uhambe. Into ecacileyo akufun'
ukusebenza, baninzi abantu abadingayo. Aliz' ukutshona eli
ndingafumananga mntu." Akunje kumadoda odwa, koko nasebafazini.
Uvelwano lufuneka ngamandla nangamandla kuthi thina bantu baNtsundu
beli le*Republic*. Ingathi ikhe yenziwa le nto uphuculo lwesizwe 70
lungakhawuleza ngephanyazo, kuthi ngephanyazo umgangatho
wenkqubela phambili yethu ube uphezulu.

[Sicatshulwe kwincwadi ethi 'NDITHUNGILE SELANI', ebhalwe ngu:Tom D.V., amaphepha 87–94,
saze sahlelwa]

OKUBONWAYO:

ISICATSHULWA B



[Sicatshulwe kwi-intanethi www.googlesearch.com]

ISICATSHULWA A

Jonga kumhlathi woku-1.

- 1.1 Xela iziphumo zentshumayelo engovelwano ngokwalo mhlathi. (1)
- 1.2 Sibonakalisa ntoni isimamva esikrwelelwe umgca ngaphantsi kwesi sivakalisi silandelayo?
'... angathatyathwa njengomntu owenze into enkulukazi.' (2)
- 1.3 Nika intsingiselo yeli binzana lilandelayo:
'... luthwaka.' (2)
- 1.4 Xela isafobe esisetyenziswe ngumbhali kwimiqolo yesi-6 ukuya kweye-9. (1)

Jonga kumhlathi wesi-2.

- 1.5 Sisetyenziswe njani isifanekisozwi esikrwelelwe umgca ngaphantsi?
'Abantwana bawancina amehlo bamthi ntshoo ...' (1)
- 1.6 Ucinga ukuba sithini isizathu sokungcangcazela kwemilebe kaYohane Ongcwele? (2)
- 1.7 Guqula esi sivakalisi silandelayo sibe kwimo yengxelo-ntetho:
'Yathi inkonde, "Bantwana thandanani."' (2)

Jonga kumhlathi wesi-3.

- 1.8 Ingaba uyangqinelana noluvo lombhali lokuba abo sibavelayo masibancede ngokubaphungulela loo mithwalo ibasindayo? Xhasa impendulo yakho. (2)
- 1.9 Shwankathela lo mhlathi ngesivakalisi esinye. (2)

Jonga kumhlathi wesi-4.

- 1.10 Sebenzisa igama elibhalwe ngqindilili linike intsingiselo eyahlukileyo kuleyo ikwiscatshulwa. (2)

Jonga kumhlathi wesi-5

- 1.11 Lizisa ntsingiselo ni ngovelwano igama elikrwelelwe umgca ngaphantsi? (2)
- 1.12 Khetha impendulo engangqinelaniyo kwezi zilandelayo:
Umbhali uthi aba bantu balandelayo mabathabathe intwana baphe abalambayo:
- A Abaneziphiwo zomsebenzi wezandla
 - B Abanethamsanqa lokutyeba ngemali nemfuyo
 - C Abanethamsanqa lokuba nengqondo ebukhali kunabanye
 - D Abashiywe nelifa ngabazali. (1)

Jonga kumhlathi wesi-6.

- 1.13 Caphula isivakalisi esibonakalisa ukuba intlungu eyehlela abasebenzi ayikhethe sini. (2)
- 1.14 Ingaba la mazwi womqeshi kwesi sicutshulwa aveza luphi uluvo lombhali ngabaqeshi? Xhasa impendulo yakho. (2)

ISICATSHULWA B

- 1.15 Kwenzeka ntoni kulo mfanekiso? (2)
- 1.16 Xa uqwalasele okwenzeka kulo mfanekiso ingaba lukhona uvelwano phakathi komqeshi nomqeshwa? Xhasa impendulo yakho. (2)
- 1.17 Ingaba oku kwenzeka kulo mfanekiso ukwiscatshulwa B kuhambelana nowuphi umhlathi kwiscatshulwa A? Xhasa impendulo yakho. (2)

AMANQAKU ECANDELO A: 30

ICANDELO B: ISISHWANKATHELO**UMBUZO 2: UKUSHWANKATHELA NGAMAZWI AKHO**

- Funda ngocoselelo esi sicutshulwa singezantsi **singeengcebiso ngezinto onokuzenza ukuzikhusela kwintsholongwane yeKhorona**, uze usishwankathele ngamazwi akho ungacaphuli kwitekisi.
- Impendulo yakho mayingadluli kumagama angama-70.
- Shwankathela **ngokomhlathi kuphela**, kodwa isishwankathelo sakho masiquke iingongoma ezi-7. (7)
- Bhala inani lamagama owasebenzisileyo kwizibiyeli.
- Akulindelekanga ukuba ubhale isihloko sesishwankathelo.
- Qaphela indlela echanekileyo yokusetyenziswa kolwimi, iimpawu zobhalo nococeko. (3)

ISICATSHULWA C**INTSHOLONGWANE YEKHORONA**

- 1 Ihlabathi lijongene nomceli-mngeni wempilo ogqugqisayo ngokungenalusini. Lo mceli-mngeni nekungekafunyanwa chiza lililo ubizwa ngokuba yi-Covid 19. Okwangoku kucetyiswa ukuba uluntu luzame kangangoko ukuzikhusela kulo bhuhane unwenwa nobulala uluntu ngendlela emangalisayo.
- 2 Uphando lubonakalisa ukuba lo bhuhane unwenwa ngokudibana kwabantu. Kubalulekile ke ngoko ukuba abantu bazifundise ukuqelelana. Oku kuqelelana kubaluleke nangakumbi xa uhleli nabantu abakhohlelayo kungenjalo abathimlayo. Zikhwebule kwiindibano ezinabantu abaninzi, kuba ingxinano ingangunobangela wokosulelana ngale ntsholongwane. Kukho nemithetho ngokwamazwe ngamazwe elawula omakwenziwe kwiimeko zeendibano zoluntu.
- 3 Hlala ekhaya xa uziva ngathi awuziva mrandi, kuba oko kuyakuncedisa ukuba ungosuleli abanye xa kuthe kanti unayo le ntsholongwane. Masikhumbule ukuba amajoni omzimba kwabanye abantu awanawo amandla okulwa nezifo ezingoozungulichele. Iingcali zempilo zithi amathuba okuphila emva kokuba unayo le ntsholongwane maninzi xa uzigcine ekhaya.


- 4 Ukuhlambisisa izandla rhoqo ngamanzi nesepha kungakugcina ukhuselekile kusuleleko lwentsholongwane yeKhorona. Lo ngoyena ndoqo uncedisana nokulwa ukunwenwa kwale ntsholongwane kuba kukholeleka ukuba ayihambi ngomoya. Iingcali zezempilo zinobungqina bokuba le ntsholongwane yosulela ngendibano nalowo unayo.
- 5 Nxiba i-*mask* egquma umlomo nempumlo maxesha onke. UMongameli weli loMzantsi Afrika uwise umthetho wokuba nabani na ofunyenwe engasinxibanga isicheme kufanele atshutshiswe ngokwasemthethweni. Oku kubonakalisa ukuzimisela kweli lizwe ukunqanda ukunwenwa kwale ntsholongwane.
- 6 Musa ukubamba impumlo, umlomo kunye namehlo kuba kusenokwenzeka ukuba ububambe indawo eneKhorona ungaqondanga. Yiyo ke loo nto kucetyiswa ukuba sanithayiza izandla zakho rhoqo. Uya kufika ke kuzo zonke iindawo ezingena uluntu zinabantu abaqeshelwe ukusanithayiza abantu. Oku kuquka iivenkile, amaziko ezempilo, izikolo kunye nawo onke amaSebe kaRhulumente.
- 7 URhulumente weli loMzantsi Afrika umanxadanxada umisela imiqathango engqongqo yokuthotyelwa kwezi ngecebiso zingentla. Eyona nto ibalulekileyo kukuba umntu ngamnye aluthabathele kuye uxanduva lokukhusela impilo yakhe.

[Sicatshulwe kwi-intanethi, www.googlesearch.com, saguqulelwa saze sahlelwa]

AMANQAKU ECANDELO B: 10

ICANDELO C: IZAKHI NEMIGAQO YOKUSETYENZISWA KOLWIMI**UMBUZO 3: UKUHLALUTYA INTENGISO**

Funda le ntengiso ingezantsi (ISICATSHULWA D) uze uphendule imibuzo esekwe kuyo.

ISICATSHULWA D

[Sicatshulwe kwi-intanethi www.googlesearch.com, saguqulelwa saze sahlelwa]


- 3.1 Xela umsebenzi wale mveliso ikule ntengiso. (1)
- 3.2 Ijoliswe koobani le ntengiso? (1)
- 3.3 Yintoni injongo yokusebenzisa ifonti enkulu xa kubhalwa igama lale mveliso? (2)
- 3.4 Ingaba igama 'ESEMPILWENI' liyahambelana nomfanekiso wenenekazi elikule ntengiso? Xhasa impendulo yakho. (2)
- 3.5 Khetha impendulo engangqinelaniyo kwezi zingezantsi. I-Colgate i:
- A Ilwa iintsholongwane
 - B Igcina amazinyo esempilweni
 - C Igcina iintsini zisempilweni
 - D Ikwenza ube mhle (2)
- 3.6 Kubethelela ngcinga ni ukusetyenziswa komfanekiso wenenekazi elibukekayo kule ntengiso? (2)

[10]

UMBUZO 4: UKUCAZULULA IKHATHUNI

Funda le khathuni ingezantsi uze uphendule imibuzo esekwe kuyo.

ISICATSHULWA E



[Icatshulwe kwi-intanethi, MADAM AND EVE CARTOONS www.googlesearch.com, yaguqulelwa yaze yahlelwa]

- 4.1 Babonakala bephi aba bantu bakule khathuni? Xhasa impendulo yakho. (2)
- 4.2 Nika ubungqina obubonakalisa ukuba lilizwe loMzantsi Afrika eli lifakwe kwikhwarrantini. (1)
- 4.3 Uthini umyalezo odluliswa yindlela abanxibe ngayo oogqirha kule khathuni? (2)
- 4.4 Xela into ebonakalisa ukuba oogqirha abafuni ukosuleleka yile ntsholongwane. (1)
- 4.5 Ucinga ukuba sithini isizathu sokuba uMzantsi Afrika ufakwe kwikhwarrantini kwezorhwebo namazwe ehlabathi? (2)
- 4.6 Lunafuthe lini urhwaphilizo kuphuhliso lwelizwe loMzantsi Afrika? (2)

[10]

UMBUZO 5: UKUSETYENZISWA KOLWIMI NGOKUCHANEKILEYO

Funda ISICATSHULWA F, uze uphendule imibuzo esekwe kuso.

ISICATSHULWA F**U-‘ENKOSI’ OSUK’ ENTLIZIYWENI**

- 1 Kule mihla uninzi lwabantu *baxhalabele* kakhulu iziqu zabo. Oko kuchasene kakhulu nomoya wokuba nombulelo, athi umntu xa enawo acingele nabanye, aluvakalise lula uxabiso ngezinto ezilungileyo ezenziwa ngabanye. Uya kufumanisa ukuba, ukuba uzifundisa ukuba nomdla onyanisekileyo kwabanye, uluvakalise ngokukhululekileyo noxabiso lwakho ngabakwenzayo, uya kuba ngumntu owonwabileyo.
- 2 Ukungabi nambulelo kugawula kanye ezantsi kweyona nto iyimfuneko ukuze siqhubeke siphila, ukuncedana. Umntu ngamnye engumntu anguye akanakuba nobuchule kwinto yonke eyimfuneko ukuze ubomi buphileke. Akakho umntu onezinto zonke. Bambalwa phakathi kwethu abafuna ukuba ngamakheswa, okanye abangaphila bengawo. Ke **omnye** uyimfuneko komnye.
- 3 Xa ke imigudu yethu yokunceda abanye ithatyathwa lula ngabo bantu sibancedayo; xa abantu besisebenzela bentshingintshingi ebusweni ukanti bayahlawulwa ngomsebenzi abasenzela wona; xa sithi sizama ngokuzimisela ukwenzela umntu ububele asuke asikrokrele; xa sithi sakubonisa ulwazelelelo kwabanye sisuke sicingelwe ukuba senziwa bubuthathaka, kusuka ke ukungabi nambulelo kwabo kubethe kufike entliziyweni. Ukuba kwakha kwenzeka oku kuwe, uyazi ukuba kwenzakalisa kangakanani ukungaxatyiswa kwemigudu yakho yobubele.

[Sicatshulwe kwincwadi ethi 'RHWEBA UBULUMKO' ebhalwe ngu:O.S. Dzingwa, amaphepha 48-49, saze sahlelwa]

- 5.1 Guqula isenzi esibhalwe bukekela sibe kwimo yesilanduli. (1)
- 5.2 Xela isakhi esikrwelelwe umgca ngaphantsi kwisicatshulwa. (1)
- 5.3 Xela umsebenzi wesimava esikrwelelwe umgca ngaphantsi kwesi sivakalisi silandelayo.
'Ukungabi nambulelo kugawula kanye ezantsi kweyona nto iyimfuneko ... ukuncedana.' (2)
- 5.4 Nika isichasi segama elikrwelelwe umgca ngaphantsi kwisivakalisi esilandelayo.
'Bambalwa phakathi kwethu abafuna ukuba ngamakheswa ...' (1)

- 5.5 Sebenzisa igama elibhalwe ngqindilili linike intsingiselo eyahlukileyo kuleyo ikwiscatshulwa. (2)
- 5.6 Nika intsingiselo yegama elikrwelelwe umgca kwesi sivakalisi silandelayo.
- '... xa abantu besisebenzela bentshingintshingi ebusweni ...' (2)
- 5.7 Sisetyenziselwe ukubonisa ntoni isihlomelo esibhalwe bukekela kwesi sivakalisi silandelayo?
- '... kusuka ke ukungabi nambulelo kwabo kubethe kufike *entliziweni*.' (1)

[10]

AMANQAKU ECANDELO C: 30
AMANQAKU EWONKE: 70